

Cynnig safle ysgol Gymraeg newydd



Bydd cyfarfod arbennig yn cael ei gynnal yn Neuadd y Sir ddydd Iau nesaf (21^{ain} Ebrill) ar ddarpariaeth addysg uwchradd trwy gyfrwng y Gymraeg yng nghanol a gogledd-orllewin Sir Benfro.

Bydd Cynghorwyr Sir yn clywed bod safle'r ysgol newydd arfaethedig yn Ffordd y Llwyn Helyg, Y Llwyn Helyg, Hwlfordd.

Mewn adroddiad i'r Cyngor, mae Kate Evan-Hughes, Cyfarwyddwr Plant ac Ysgolion, yn datgan: "Bydd yr aelodau'n ymwybodol y tynnwyd y cynnig hwn o elfennau eraill ad-drefnu addysg uwchradd yng nghanol a gogledd-orllewin Sir Benfro, er mwyn symud ymlaen gydag ysgol uwchradd Gymraeg newydd.

"O ganlyniad, bu angen ystyried dewisiadau yn lle safleoedd y ddwy ysgol uwchradd bresennol yn Hwlfordd.

"Gwnaed gwaith ymarferoldeb i benderfynu'r safle mwyaf priodol ar gyfer yr ysgol arfaethedig a chanlyniad hyn fu ystyried ardal y Llwyn Helyg fel y mwyaf priodol."

Mae'r adroddiad yn ychwanegu bod y Cyngor wedi cytuno cyfnewid contractau'n amodol ar ganiatâd cynllunio boddhaol a chymeradwyaeth y Cyngor a Llywodraeth Cymru.

Gofynnir i'r Cynghorwyr dderbyn argymhelliad awdurdodi'r Cyfarwyddwr i gyhoeddi Rhybudd Statudol i derfynu Ysgol Gymraeg Glan Cleddau ac i sefydlu ysgol Gymraeg / ddwyieithog 3-16 newydd ar dir yn Ffordd y Llwyn Helyg, Hwlfordd gyda darpariaeth cyfrwng Cymraeg ôl-16 yn Ysgol y Preseli.

Os bydd y Cyngor yn cymeradwyo'r argymhelliad, bydd Rhybudd Statudol yn cael ei gyhoeddi ar 26^{ain} Ebrill 2016 gydag adroddiad ychwanegol yn dod ger bron y Cyngor i benderfynu'r cynnig.